

滋賀縣尋常
中學校藏書
部類
番号
記号
冊數

名節錄

三

281
50
Vol 3



名節錄卷之三

栗山利安

攝津守村重

栗山利安稱四郎右衛門。後更稱備後守。仕黑田
 孝高。天正六年。荒木村重以伊丹城叛。織田信長
 孝高為信長如伊丹。說村重。村重收孝高繫獄。利
 安偽為賈人。如伊丹。因所識銀工某。潛入城。覘獄
 畔。衛卒嚴備不可近。獨獄後有隍不備。乘夜泅而
 就獄。見孝高。後賂獄卒。得數往通消息。七年九月。
 村重留將士守城。潛與左右數騎走尼崎。十月。利

名節錄

卷之三

岡田氏藏

安從織田氏將瀧川一益攻伊丹十一月拔城利
安馳詣獄解孝高孝高痿痺不能起令健率負以
出孝高嘉其忠蓋賜名馬及豐臣秀吉西征從孝
高有功後孝高封于豐前國內多倍叛者野中鎮
兼據長巖城其弟兵庫據鴈股岳最豪強難制利
安受命擊鎮兼兄弟夷之孝高賞以其邑黑田家譜文
祿元年朝鮮之役作利安從孝高子長政為先鋒
攻拔金保城斬城將伯子顏進赴國都朝鮮兵據
蒙霧山利安擊走之朝鮮征伐記二年長政屯白川使

利安及黑田總右衛門母里太兵衛後藤基次等

守江陰城

黑田家譜按征伐記文祿元年小西行長屯鴨綠江大友義統屯平壤黑田長

政屯葛原互為應援長政先鋒將栗山利安後藤基次黑田總右衛門等以千七百

月二日夜忠清道節度使李時言率平安咸鏡二道兵四萬五千向狼川候騎來報於是諸將告急

長政又按武邊咄聞書慶長二年九月十三日長政先鋒將栗山利安後藤基次黑田總右衛門等

以三千人守和寧關明將麻貴牛伯英高會小西策以四萬人來攻皆與本書不合蓋誤

行長敗于平壤明兵四萬來攻江陰時城兵僅二

千七百人諸將將請救連署報長政曰明兵夜渡河

來襲願急賜援兵利安視書曰又有不可者乃命書

名節錄 卷之三 三 同日武藏文

史刪去賜援兵一句。而後署名。今士卒曰。兵寡援遠。唯有死而已。汝等勉旃。勿貽恥於海外。因爲圓陣以待。明兵侮我寡。縱兵競進。利安與太兵衛基次等衝突明軍。明軍披靡。我兵乘之。殊死戰。莫不一當百。終大破之。長政得報大驚。自將來接。則明兵旣退矣。長政詣利安營。利安方被創。倚根苞。長政謂曰。卿若何。輕卒爲戰也。利安忽張目。睨長政曰。寇來安得不拒。長政垂涕曰。卿愠吾失言。非無謂也。雖然。使卿等皆致死。吾不及事。則吾何面目獨立于世乎。

以孤軍破四萬兵。絕群拔類。卿之功固不待今日而知也。慎勿以介意。黑田總右衛門。啣利安改報書。白長政曰。臣等欲速請救。以改報書。致遲緩。後期。利安厲聲曰。改報書者非他人。卽臣利安也。臣臨報急竊度。此去白川八里。大敵迫咫尺。而遠仰往返十六里之援。何能及死。一耳。坐待無及之援。寧決死一戰。使天下道黑田氏先軍。以寡兵抗大敵。以力不支。闔城致命。大閣聞之。亦不爲辱我武矣。臣是以改其文。乃所以擬永訣書也。長政歎稱。

久之是役利安部兵山本甚大夫津田才藏栗山甚太郎等皆獲首級慶長五年長政從東照公討上杉景勝命利安及母里太兵衛守大阪第既而石田三成起兵應景勝欲收諸侯擊在大阪第者徙之城中利安與太兵衛以計逸長政大夫及夫人單舸歸豐前尋從孝高攻豐後諸賊事平長政封于筑前今利安守左右良城食祿一萬五千石寬永八年沒

參取黑田家譜武邊咄聞書

村田吉次

村田吉次播磨人本姓井口稱與之助後更稱出羽父曰與次右衛門生四子長猪之助次六大夫次甚十郎次即吉次並仕黑田孝高孝高為羽柴秀吉狗播磨攻拔平坪城令猪之助及三宅藤十郎守之既而敗卒復起圍城藤十郎踰城告急於孝高猪之助登陴拒戰被創自殺城乃陷六大夫從軍有功孝高使其守北條城為賊所圍死之甚十郎為人勇健嘗有兄弟三人得罪亡去者孝高使人追之殺追者匿市中甚十郎請往捕之孝高

不許強請之。單騎馳至其家，跳而入，斬一人，捕二人而出，悉列之。提其首歸，路遇其奴，槍鏃甚十郎。甚十郎拔刀斬之，身既被重創，墮馬死。孝高憫其兄弟皆死于事，自詣其父宅吊之，召吉次，祿之。吉次甫九歲，孝高嘗欲試其才，夜使人僞刑死，倚礫柱上，命吉次往檢之。吉次唯而起，獨至礫柱下，植標將歸，柱忽搖動。吉次以爲氣息未絕也，將攀柱刺之。其人窘急脫走。吉次大怒，追之，路有一祠，跳入祠中，閉扉告故。吉次不信，索孝高所與章服，偏

袖。吉次乃釋之。出是孝高知其器可用。朝鮮之役，從孝高子長政航海。一日長政過曠野，有一大洞，直通山麓，虜伏射手亂射，我兵多死，衆不敢近。吉次兵山崎喜兵衛獨進入洞中，獲虜三人。吉次舍馬，亦入洞中追虜，大破之。吉次因請朱幹槍，長政曰：「在法非一日獲七首級，不許執朱幹槍。」無幾，吉次一日獲七首級，賜朱幹槍，衆榮之。常山紀談

恒屋善七郎

恒屋善七郎，黑田長政近臣也。長政父孝高之封

豐前也。城井谷友房。負險不服。長政年甫十六。請伐之。孝高不許。長政潛出兵伐友房。友房據險亂射。我兵不利。箭中長政馬。馬蹙。管正利授己馬為圓陣以退。長政愧敗。閉門卧。善七郎適使於京師。歸入長政卧內。復命。因諫曰。今日之戰。群下皆棄郎君逃。是當致死之秋也。奈何苟免以辱父祖。使臣在左右。必不取此辱。乃為怯懦輩所誤。願君勿再誤。居無幾。賊入土毛郡。善七郎從長政拒之于火隈山。賊來薄。長政擊破之。斬賊將鹽田內記善。

七郎馳入賊軍。獲鬼木掃部。又進獲首二級。被重創而退。聞長政有功。喜曰。郎君雪前日之恥。臣死無遺憾矣。言訖而終。長政為攬涕。常山紀談

小河傳右衛門

小河傳右衛門。黑田氏臣也。朝鮮之役。從其主長政。受命守龍泉城。小西行長在平壤。為明兵所圍。請救於大友義統。義統聞之大懼。棄鳳山走都城。路過龍泉。謂傳右衛門曰。行長為明兵所攻。顧已戰沒。虜衆今至。子宜引退。傳右衛門對曰。臣受主

命守城。城不可棄。寇至將枕城死。何言退也。義紘遂去。行長以城難支。潰圍逃。欲與義紘合。抵鳳山。義紘既去。乃走都城。明兵追躡。行長遙見龍泉城。旗幟知我兵未去也。乃大喜。傳右衛門聞。遂至登城樓望之。明兵方追行長。行長且戰且退。傳右衛門使川島七郎右衛門。河端八左衛門。率銃手百人赴援。行長迎謂曰。我兵疲矣。請子爲殿。二人對曰。諾。乃留拒追兵。行長入城。見傳右衛門。謝曰。我賴卿得再生。不知所謝恩。傳右衛門曰。此地險阨。

資糧饒足。寇雖衆不足畏也。公戰疲宜休。防禦之事。僕請任之。行長嘆稱曰。天下豪勇。孰踰卿者。遂去還都城。會長政使者至。命傳右衛門撤兵退。時長政先鋒栗山利安等守江陰城。傳右衛門退而與利安合。俱拒明兵破之。豐臣秀吉聞之。召傳右衛門。欲賞以豐前妙見龍王。許萬石。傳右衛門適得疾。還至對馬而沒。世惜之。黑田家譜

芳賀內藏允。池田輝政臣也。關原之役。內藏允以

書佐從輝政。輝政與福島正則等攻拔岐阜。將報捷於關東。命內藏允作報書。適城中誤失火於硝櫃。烟焰四逆。聲震地。軍中大駭。內藏允方執筆。神色不變。輝政奇之。使其治事。皆有功效。由是知其可用。拔擢賜祿二千石。寵任日渥。大阪之役。從輝政子利隆。攻大阪城。利隆屯天滿橋側。命先鋒須賀左京樹竹柵。左京請增役卒。利隆命內藏允往視之。內藏允服紅短襖。躡屣至。上車傍。按轡檢之。衆以內藏允新超用。欲試之。謂曰。橋北有標柵。請

往檢之。內藏允曰。諾。乃下馬沿柵步。賊兵瞰見。發銃。內藏允舉止自若。徐數其步。以度柵之遠近。還而復命。衆服其膽勇。後與伴大膳俱參政事。大膳爲人忠亮。群下有所建言。輒曰。我將白吾君。及其進白。便宜事。或不敢盡言。至內藏允。則知無不言。所言無不盡。或不肯從。則犯顏爭是非。必得允而後止。時人稱內藏允其輪竭忠。款勝大膳云。貴而者草

井戶龜右衛門

井戶龜右衛門。初仕小野木氏。後去爲細川氏臣。

爲人重厚有膽量。有增田藏人亦細川氏臣也。資性豪縱。食祿六千石。而家計極乏。龜右衛門嘗受托其父交情。殊篤。數箴之以節儉。爲言不聽。無幾藏人役江戶。奢靡滋甚。龜右衛門憂之。以爲箴之不以計。彼終不悛。料其交代將還。間行至桑名。伺其過驛。策馬而東。健丁十人從焉。如將赴江戶者。藏人見之。顧曰。卿非龜右耶。曰。事急不得緩語。怒馬馳去。藏人回馬追之。曰。平日交誼。豈容如此。執其轡不縱。龜右衛門乃下馬。曰。將軍將有事于

大阪。藩兵刻日往會。藏人愕然曰。吾無儋石之儲。卿所悉。今日之計將如之何。龜右衛門舉蹙曰。吾屢戒卿以奢侈。而卿不省。及今悔何及。藏人泫然淚下。龜右衛門見其窘甚之狀。乃曰。前言聊試卿耳。雖然。方今天下恟恟。志士當預爲之備。而卿放奢無度。一旦中原有事。豈可垂涕而止乎。諺曰。冬衣裁于夏。雨傘製于晴。卿其勉旃。藏人感悟。自是勤儉以奉國爲務。後三年。大阪之役作。藏人率兵數百人從焉。蓋龜右衛門切偲之功也。龜右衛門

少以勇力聞。其仕小野木縫殿助也。從攻江見某。城將下。縫殿助謂其下曰。誰能爲我斬江見者。龜右衛門年甫十七。進曰。能。兄某在旁。睨曰。豈于勿妄言。叱去之。龜右衛門曰。妄與不。請待明日。卽夜潛入城。匿廡下。天明。江見出。龜右衛門躍出搏伏之。斬其首。登俾大呼曰。江見首已落吾手矣。汝曹將爲誰守。城兵逃散。衆皆壯之。龜右衛門曰。吾幼喜角觝。頗得其術。當與江見搏。偶自失其術。輾轉數次。始能施其術。豈大勇者之爲哉。及年已老。雖

簪力稍衰。氣宇儼然。常習射于家。曰。平昔專用長槍大刀。未嘗用弓矢。今也衰朽。不可復爲往時之戰。宜輕弓弱矢。收功于刀槍之外。亦一樂事也。其

勇如此。

明良洪範

之曰藪內匠

藪內匠。初稱與次右衛門。仕中村一氏。屢有戰功。內匠爲人。沈深有器局。豐臣秀吉之伐北條氏也。一氏從攻山中。拔之內匠先登。渡邊了次之。了背旗甚大。秀吉登高望見之。以爲了先登。賞了以先

登之功。內匠不敢爭。既而一氏賜二人祿各三千石。特賜內匠以見米。吾邦俸祿之制。大率七分之四。見米三千石。當祿七千五百。了心不平。遂致仕去。臨去。遣价內匠曰。願與子相見于郊。內匠即往。了馬上橫偃月刀。邀內匠勞之曰。吾將遠行。不可不與故人訣。然故人中可為訣者。獨有卿而已。因捧刀曰。聊寓別意。卿幸善藏焉。言恭而色怒。內匠神色自若。進受刀曰。吾亦且歸。卿乃拔佩刀與之而別。人皆壯之。慶長五年。東照公討上杉氏。一氏得疾。口篤。曰。方今可托吾見子。

彥右衛門尉
榮

者非內府而誰。乃使內匠通款。公許之。一氏命弟一榮率軍從。公于關東。既而石田三成等起兵美濃。一榮還軍。內匠從。一榮至美濃池田。輝政。福島正則等將攻岐阜。內匠聞之。曰。在昔豐臣氏之軍。我兵每為之先。乃與武田又六野一色。賴母。諸軍監請為先鋒。正則在坐。驕豪負氣罵曰。一榮小兒。口吻猶黃。欲敢為先鋒乎。詰且之事。有正則在焉。叱之使退。又六賴母相顧而退。內匠憤激不肯去。謂正則曰。往日式部之在軍也。公特

伯耆守忠

偏裨耳。今日以式部不在。抗顏自大。無乃為無鳥
鄉蝙蝠乎。正則大怒欲斬之。眾救而解。聞者稱其
抗直。九月十四日。從擊宇喜多氏。石田氏兵於株
瀨川破之。追而涉川。遇伏不利。及事平。氏既率
嗣子忠。一年少放恣無度。殺其老橫田內膳舊臣
不服。往往逃亡。內匠亦去。隱京師。初內匠與福島
正則爭先鋒也。細川忠興亦在坐。深重其為人。至

是厚聘招致之云。

明良洪範忠一殺其老
橫田內膳據藩翰譜

矢野正倫

矢野正倫稱和泉守中村氏臣也。中村忠一蚤卒。
其妾生一男。猶幼。宰臣有議不協者。以無子聞。由
是封除。正倫慨然。訴之于關東。踰歲不得申達。正
倫深傷遺孤之無依。而主家不血食也。甲寅之役。
詣大阪。自陳情。請曰。臣願效力。行間事成。則賜舊
封遺孤。以紹其家。豐臣秀賴義而許之。授客兵五
十騎。為隊將。十一月。正倫與飯田家貞等率兵守
今福。穿壕樹柵。晝夜督役。設假橋。出銃。柵外以
備之。佐竹義宣先鋒。梅津憲忠。戶村義國。潛兵自

隄下進逐銃卒逼柵。正倫渡橋拒戰。中鎔而沒。家
貞亦戰歿。識者哀其志。難波戰記

論曰。矢野正倫訴中村氏遺孤事於關東。可謂義也。然事不得申達。則亦可以已矣。反附大坂。仇關東何也。安積澹泊曰。正倫委質秀賴。則不可。然不如此。無以遂其志。而中村氏不得血食。故欲著功。以直遺孤其志。有可哀者。今福之役。奮戰而歿。命也。其忠操凜然。當時懷利苟合者。豈可不愧哉。

真鍋貞成

真鍋貞成稱次郎兵衛。後受稱主馬大夫。利泉人。父曰主膳兵衛。天正十一年。羽柴秀吉使中村一氏守岬和田。招聚土豪。以備根來雜賀黨。貞成於是屬一氏。明年。秀吉與織田信雄生隙。將攻尾張。中東照公援信雄。誘根來雜賀黨襲大坂。以月根來雜賀黨來攻岬和田。淡路人菅平右衛門及弟三郎兵衛等應之。以兵船二百艘攻堺。國中震駭。一氏堅守岬和田。貞成時年十七。請曰。聞賊以舟師侵堺。臣族屬在大津。恐為賊所鈔掠。願往拒之。

名節錄 卷之三
一氏許之。使秋山助之。丞助之。貞成直赴大津。大津民聞寇且至。修古城據之。助之丞勇而有策略。謂貞成曰。事急矣。且決策定所向。否則士卒潰散。不爲我用。貞成曰。策將安出。曰。策有三。納孛於城中固守。上策也。使孛避賊。墾津而身還。岍和田中策也。與俱赴墾津。下策也。貞成曰。吾從上策。助之丞曰。如此則無生路矣。貞成拔刀矢曰。丈夫寧守城而死。不肯棄城苟活也。衆皆奮躍。旣而管兄弟以千餘人將上岍。貞成曰。坐待賊來。不如邀擊之。

於是使助之丞及田賀井某等。疾賊半上陸。齊射而親自林中突出。以短兵接戰。大破之。敵迺遁去。會一氏遣兵來援。貞成率其族俱歸岍和田。根來雜賀黨聞之。亦解圍去。初秀吉將發。大阪聞海陸兵並起。爲之延期。及得捷報。乃發。根來雜賀黨聞之。復來攻岍和田及墾。一氏邀擊破之。貞成爲先鋒。有功。秀吉賜賞書。尋屬堀秀政。及戶田茂部後事。東照公死。關原之役。子孫世爲麾下士。武邊世嗣

松野主馬

松野主馬小早川秀秋臣也。關原之役從秀秋將前軍屯松尾山。先是秀秋陰通款。東照公及東西軍戰。酣秀秋使村上宇兵衛傳文戈之命於前軍主馬大驚曰。臨戰變節。乃不義之尤者也。小早川家未嘗有此事。吾不能奉命。唯有一死報國耳。宇兵衛曰。主公既與內府定約。專為宗社。不可中變。今子獨拒命。奈宗社何。主馬曰。彼比引兵及秀秋去。臣自來。今召止馬掌政。固斷不出田。

中吉政厚禮招之。乃出。食祿一萬石。後大納言駿河侯忠長召為宰。賜祿二萬石。忠長卒。封除。去復住京師。號道圓。以病沒。關原記大全。落穂集。按落穂集。道圓隱大津。今從大

全。松野一作松平。

田中內藏之丞

田中內藏之丞。藤堂高虎臣也。初仕島津氏。從伐大友氏。有功。後有故去。仕藤堂氏。朝鮮之役。高虎擢內藏之丞。為船隊率。以功食祿五百石。後得罪。褫祿。及大阪之役。作上書請以死自效。不允。其子

源三郎深懷忿嘆諫父去不聽曰往年吾去薩摩於心不安焉豈可再去夏今源三郎上書請立功贖父罪見允於是內藏之丞謁高虎於天王寺屬藤堂良勝有功復舊祿夏賜源三郎以祿夏役高虎擢內藏之丞為五十騎長戰若江死之

元和先鋒錄

友田吉直

友田吉直稱左近右衛門父曰繼林吉家仕官部繼潤以功食祿二萬石朝鮮之役吉家從繼潤子兵部少輔有功後去隱京師藤堂高虎素奇吉家

朝鮮之功召之給祿一萬石後有故去高虎愛其才武再召給三千九百石尋以病沒吉直承父後食祿千石為母衣隊無幾坐事褫職大坂夏役吉直欲建功以償罪戰八尾獲二甲首命從者獻首級麾下而自馳至地藏堂聞藤堂高刑等與長曾我部盛親戰敗死乃橫衝盛親陣死之

元和先鋒錄

渡邊了

渡邊了稱勘兵衛仕中村一氏豐臣秀吉之東征也今一氏及田中吉政堀尾吉晴山内一豐一柳

兵部少輔吉政帶刀先生吉晴對馬守一豐

左衛門大夫氏

直末等。攻北條氏勝於山中城。了從一氏自三島
進。城外有一寨。一氏令了往訶之。了曰。若敵兵寡
弱。可攻而取。即舉麾。請速進兵。定約而去了。近寨
視之。兵寡無備。因麾之如約。一氏急進軍。了以鳥
毛為徽號。長丈餘。躍馬先登。秀吉遙望見其徽號。
使人問之。乃了也。秀吉嗟嘆。今諸軍為聲援。了奮
戰拔寨。斬守將間宮好高。我兵已拔寨。乘勝攻城。
了直進破二郭。田中堀尾山內諸將繼進。城兵不
能支。氏勝棄城遁。秀吉召一氏及了褒獎之。由是

了名顯天下。後有故去。仕增田長盛。參取烈祖成績。落穗集。關

東古戰錄。按武德安民記。了作吉光。關原之役。長盛得罪。放高野。

東照公命藤堂高虎。池田長幸。收其邑郡山。時了
與田中角之助。為郡山留守。高虎長幸。率兵至郡
山城下。傳命。二人對曰。臣受主命守城。非有主命。
城不可致也。高虎長幸聞之。公既而長盛書至。
命致城於二將。二人見之曰。此非真蹟也。願得真
蹟。高虎長幸又聞之。公了謂角之助曰。我數建
違言。內府必怒。若有緩急。我先殺妻子。然後與子

名節錄 卷之三 十七 關原氏戰後

俱死。我卒徙之內城矣。子盍亦同徙也。先是角之助以妻子為累。出之城外。至是意悔。告以故。曰。

吁。無及也。頃之。長盛手書至。諭以致城。二人拜讀。

乃致城而去。參取慶長軍記。關原合戰誌。關原餘史。按關原記。大全。長盛之奪封處。流

也。東照公命筒井定次。及大和將士。收郡山。定次屯笠置。奈良間。大和將士屯玉水。郡山留守將

橋與兵衛。鹽屋法順等議。使渡邊了入第三城。處分軍事。了法今整肅。日捕斬寇賊。無敢來犯者。城

兵凡九千。逃亡相踵。而了部下無一人叛者。人服其得衆心。了於是納妻子於牙城。為質。謂與兵衛

曰。城中恟恟。其志不一。僕請以部兵二百堅守牙城。城兵聞之。納質者十人。隊將田中角之助。度

城難守。潛出妻子於城外。時人譏之。高虎深嘉了終以此廢云。與本書不合。錄以備考。

義招之。公聞其名。欲召隸麾下。堀尾吉晴亦厚

禮招之。了以先與高虎有約。遂仕高虎。其在郡山。

食邑一萬石。高虎倍之。給二萬石。長子長兵衛。三

千石。寵遇殊渥。藤堂氏宿將多嫉了者。大全。大阪

冬役了為左先鋒。屯大仙陵。會新宮人堀內氏弘

率兵自堺入大阪。過高虎營。時朝霧昏冥。了不之

覺。聞甲馬聲。勒兵而出。則已不及矣。高虎聞之大

怒。自嫌於貳心。故縱敵深誚了。了快快。夏役從擊

長曾我部盛親於矢尾。前軍不利。藤堂高刑。桑名

名節錄 卷之三
其孝等死之。盛親乘勝而進。了與諸隊扞戰終敗之。及事平。了懷不平。致仕隱近江坂本。削髮號誰菴。長兵衛留仕藤堂氏。寬文十七年。了沒。年七十九。參取難波戰記。元和先鋒錄。

論曰。渡邊了。小田原及大阪之役多功。然終以驕慢廢。要之功罪不相掩也。獨其爲增田長盛守郡山。欲舉家殉節。可謂烈矣。東魏崔楷爲殷州刺史。爲葛榮所攻。或勸楷單騎之官。楷曰。食人之祿者。憂人之憂。吾獨往。將士誰肯同心哉。遂舉家之官。

或又勸減弱小避之。楷遣幼子及一女。旣而悔之。遂追還。夫了之事甚類楷。而角之助之脫妻子。卽或者勸楷之說也。楷悔而召還兒女。了徒妻孥內城。其心一也。但楷守城死。而了則出城者。義不同耳。長盛之黨三成。固無足論。了受其託。爲之居守。其拒命不肯致城者。特以無長盛命也。猶福島丹波。埃正則書。而後致廣島。東照公不奪了之志。盡允其所請。是非徒慮損兵。乃以至公之心。完天下節義之士也。當是時。若了之請不得允。長盛死

生亦不可知。則了必踐其言而死。必不偷生苟免矣。此余所以有取於了也。比之小田原大阪之功。何啻十倍哉。

其子 孚石備前 廣瀨左馬助

孚石備前。廣瀨左馬助。俱仕井伊氏。為旗將。大阪之役。井伊直孝將前軍。受旨自宇治六地藏成列而進。時德公在伏見。二人捲旗赴伏見。直孝望見之。怒曰。何不張旗。二人對曰。此事唯委臣等。直孝數使人讓之。二人終不受命。抵伏見。遇主計。

橋而始張旗。其意蓋謂張旌旗向牙營。非軍法也。後直孝與大阪兵戰天王寺。不利。備前謂左馬助曰。吾年七十有五。無復雪耻之時。欲留死。子第速去。左馬助曰。耻同耳。如何獨生。於是二人各握旗竿。歿之。二人者。皆武田氏遺臣云。智將名言集。孚石之言據常山。

紀談。備前。
一作豐前。

論曰。世稱井伊直政。用武田氏遺臣。兵鋒益銳。余觀孚石廣瀨二人之事。而益信其言也。夫二人之仕井伊氏。職僅為旗將。其祿可知矣。而能守其職。

臨危爭死。亦足以窺武田氏兵法一斑矣。蓋武田氏兵。鍛鍊撫摩。坐作進退。必講而後用之。故至卑官賤職。皆有法度可觀。然要之在為主者指揮如何耳。勝賴不能守信玄之業。雖有鍛鍊之兵。亦無如之何。勝賴所以自亡。井伊氏所以自強。均此兵也。古人曰。材待匠而成。臣待君而用。余於二人亦云。

菴原助右衛門

菴原助右衛門。駿河人。初仕戶田民部。後仕井伊

直孝。大坂之役。從與木村重成。戰若江。我前軍不利。川手主水。山口伊豆等。歿之。助右衛門勦衆力。戰破之。進薄重成。以十字槍突其母衣。倒淖中。從兵斬其首。直孝近臣安藤長三郎。來乞其首。乃予之。曰。我與夫人戰也。彼自名曰木村重成。果信於我。未足以爲功。子其以爲功。長三郎喜。持其首去。助右衛門呼返。謂之曰。前將軍閱甲首。無他證。左則不信也。迺裂其母衣。裹首。并刀予之。東照公大獎長三郎。長三郎以是著名。助右衛門族聞之。

悔惜焉。助右衛門曰：我功。主公既能知之，我復何憾？其不矜功多此類。武邊咄聞書。落德集。助右衛門嘗從軍，卒得疾。東照公為賜藥，且命曰：當兩日服之。助右衛門拜受，即時盡服之。蓋意在戰死也。公嘆其壯勇。鹽尻

黑田彦左衛門

黑田彦左衛門，神原康勝臣也。大坂之役，彦左衛門殪一甲士，將馘之。其友三枝勘兵衛來爭之。彦左衛門即棄其首去。勘兵衛自後呼之，為不聞而

遠江守康勝

三四郎廣之或作廣登
三丁郎廣勝

馳。又擊一敵將，殪之。城陷，康勝以病卒。東照公使久世廣之、阪部廣勝論神原氏家臣功。勘兵衛呈首級，謂二使曰：此黑田彦左衛門所獲，彼即棄去。臣故拾之。二使召彦左衛門問之，對曰：臣不知也。勘兵衛曰：子向槍殪此敵，吾自後呼之，子即棄去。吾又屢呼子，子何謂不知？彦左衛門曰：吾竟不知也。公聞之，深嘉嘆之。智將名言集。本書三枝作三持。蓋誤。今據武邊

咄聞書改之。

廣田圖書

廣田圖書稱義大夫仕水野勝成爲書史大阪之役從勝成戰鷓野得首級獻之勝成大喜圖書因請曰願從君左右緩急效身勝成許之翌日從戰道明寺日暮城兵競進犯勝成陣圖書苦戰死之勝成憫圖書索其屍視之刀瘢滿身無全膚勝成爲含藥乃蘇後創悉愈以功加賜祿千石爲家宰

更稱左近

參取智將名言集
勇士物語一言集

池田市郎兵衛

池田市郎兵衛寺澤廣高臣也以勇聞初遊諸國

窮甚廣高招之給祿四百石黑田長政細川忠興聞之皆以三千石招之辭曰臣蚤爲寺澤公所知恩不可負也廣高益重之與祿三千石市郎兵衛辭曰臣豈論祿多少唯感君眷遇之厚故敢委質今日受一邑衣食足矣過之以往非所望况無功加祿臣深耻之終辭不受市郎兵衛之未來仕也嘗從某軍爲殿有一人被創仆田間呼而求救市郎兵衛扶騎已馬自擊轡退有敵三騎來薄市郎兵衛留戰殪一騎走二騎終以其人免後其人仕

黑田長政。一日長政詣廣高語之。廣高召市郎兵衛問之。對曰。方彼求救時。追騎來薄。臣自度救之。必不兩全。將棄去。又恐或有後於我者。救之。他日何面目見彼。寧共死耳。不得已而救之。臣至今愧之。長政益服其真率。曰。是難於獲百首級也。市郎兵衛每出。必齋一甲篋。三日糧。雖之鄰近亦然。武將

感狀

吉田助左衛門

吉田助左衛門。古田重勝臣也。食祿千石。重勝之

兵部少輔重勝

松坂在伊勢

從東照公東征也。使助左衛門留守松坂。會石田三成起兵圍重勝夫人於大阪第。來告曰。速致城。否則害夫人。助左衛門以謂無君命。城不可致。致城。是使天下謂吾公以城易妻子也。敵來死之耳。無幾。重勝受旨西歸。守松坂。阿濃津城主富田知信為西軍所圍。來乞救。重勝欲不許。助左衛門說曰。阿濃津陷。次必及松坂。宜及其未陷。赴援。於是遣兵五百人援之。以助左衛門計。選用疆內豪民二十人。約事平。予祿百石。其實質之也。及事平。

信濃守知信

名節錄

卷之三

三十四日

重勝欲負約。助左衛門諫曰。信不可失。苟無信。後
有事。不為我用。請分臣祿予之。重勝終如約。常山紀談

市川茂右衛門

市川茂右衛門。鳥居元忠臣也。關原之役。元忠守
伏見城。為西軍所圍。鳥居氏臣在關東。相率赴難
者四十餘騎。茂右衛門亦在其中。既而聞西軍扼
關津。不通東人。乃稍稍途歸。獨茂右衛門不肯歸。
躡身徒步而西。又聞關津檢佩刀者甚嚴。乃施刀
道傍佛寺。祝髮為行脚僧裝。剃痕隱然。關吏怪之。

曰。汝果是僧。當誦佛經書梵字。茂右衛門幼嘗寓
佛寺。略解浮屠之事。應聲書字。誦經筆畫有法。音
吐琅然。吏以為真。釋之。既達伏見城下。西軍環守。
不得入。乃詣敵營。告以實。請從已主于城中。辭氣
愿款。聞者感動。縱入城。無幾城陷。元忠戰死。茂右
衛門殉之。會津四家合考

蒲生鄉舍 島清興 小幡信世

蒲生鄉舍。本姓橫山。名喜內。近江橫山人。世仕六
角氏。六角氏亡。蒲生氏鄉。聞喜內名。召祿之。及氏

讚岐守一正

鄉封會津。賜姓。更名鄉舍。食祿一萬三千石。守梁川城及氏鄉卒。子秀行。徙封于宇都宮。多散遣家臣。鄉舍亦去。石田三成聞之。厚禮招鄉舍。給一萬石。稱備中。武德安民記。武家盛衰記。關原之役。三成以鄉舍為先鋒。擊田中兵部。金森法印走之。生駒一正援兵部來戰。法印兵部返之。我兵敗。鄉舍苦戰不退。其子大膳提首級示鄉舍。鄉舍曰。是何等時。欲視首級乎。唯有死報國爾。三成見先鋒敗。下天魔山接戰。會小早川秀秋及脇坂朽木小川赤座諸將應

有樂齋長益

東軍西軍大敗。三成走匿。膽吹山。參取安民記。慶長軍記。鄉舍見東將織田長益。呼曰。吾為蒲生備中。公豈知之乎。長益曰。若降必保無他。鄉舍罵曰。公何不識人之甚也。吾豈憑人丐生乎。直前斫長益。長益墮馬。其兵澤井久藏來救。槍刺鄉舍。鄉舍斬久藏。東兵麴至救長益。鄉舍殺傷數人而死。東照公見鄉舍首曰。備中吾所識也。命瘞其首。關原記。大膳聞父死。為絕命詞自殺。大膳自幼謹厚。不好戲。是役。其母誡之曰。吾非不願汝富貴也。然志士重名。

卷之三
二六
岡田氏藏版

二者難兼。汝謹勿苟生壞名。至是與父同死。常山紀談

島清興。稱左近允。對馬人。嘗仕甲斐山縣氏。為人

驍健。有策略。常欲依豪傑以成功名。乃去遊四方。

竊慕豐臣秀吉威風。聞石田三成得其寵。天正中

至大阪。因三成求仕。三成愛其才。與一萬石。秀吉

聞清興名。欲召用之。三成請為己臣。由是清興仕

石田氏。慶長三年。秀吉薨。三成謀除東照公。清

興數為之建策。三成不能用。武家盛衰記。清興嘗

本書清興作勝猛。逸史外史亦然。按烈祖成績曰。前車後語作勝猛。蓋杜撰也。諸家系圖纂作清興。

為是。今從之。時公在伏見。加藤清正。福島正則等七

將。與三成有隙。請公擊三成。公不許。諭三成

就封。三成密與上杉景勝。佐竹義宣等。謀。俟時舉

兵。乃還其邑。佐和山。清興說曰。內府素與七將善。

七將以私忿欲甘心我。而內府乃力救我。是其意

不可測。今欲就國。若中路有變。悔無及焉。臣料君

兵不下一萬。留一千於佐和山。徵發九千為四隊。

分付六千於臣及舞兵庫。蒲生備中。君親將二千。

縱火淺野氏第。臣與兵庫備中。自豐後橋進。襲內

名節錄 卷之三 石田三成

府向島第。內府必奔關東。赴大和路。則追至宇治。決戰。若赴山科。則以備中爲先鋒。從木幡追之。假令大阪諸將黨內府者來援。事出倉卒。部伍不整。旣獲內府。勢沮膽落。無能爲。是必勝之策也。三成曰。汝策誠善。然我旣與上杉佐竹定議。就國而後圖之。清興曰。若然。盍徵兵於佐和山。爲之備。三成從之。乃遣使徵兵三隊。各三千人。屯醍醐山科。及鏡山。然後就國。關原記是時京師訛言。三成等謀襲德川氏。伏見第。東照公以其臣柳生宗矩與

清興有舊。陰令探其情。宗矩見清興。語次從容謂曰。物情恟恟。顧戰爭復起乎。清興哂曰。當今無有剛斷如松永明智者。生出何事。亦惟怯懦輩相聚。徒騷擾而已。先是清興屢勸三成。以速起事。如松永明智。故及此也。武德安民記及關原之役。作清興從三成軍。大垣。九月十四日。候騎來報。東軍多白旗。內府必來矣。軍中騷擾。清興欲一戰以振軍氣。說三成與宇喜多秀家俱擊中村氏兵於株瀨川。清興爲先鋒。伏兵林藪中。自率輕騎挑戰。中村一榮

邀戰有馬豐氏援一榮橫衝我軍清興佯走敵乘

勝渡川而進伏發清興返之與宇喜多氏兵夾擊

破之斬獲甚多參取大全武家盛衰記按大全伏

衰記關原合戰誌落穗集諸書明日三成陣小關村植柵清興為

先鋒率步兵三千出柵左手提槍右手揮麾與黑

田氏兵挑戰中銃傷而退黑田家譜其子清長與藤堂

氏士藤堂良政搏戰斬其首將去為良政臣山本

某所刺殺清長弟清資亦死三成前軍皆敗既而

小早川秀秋應東軍擊大谷吉隆西軍大潰三成

新吉清長後稱掃部

十次郎清資後稱修理

走膽吹山三成士八條勘兵衛來說清興走佐和山清興問曰掃部修理如何曰皆死矣清興曰然則生亦何為乃馳出勘兵衛牽鎧袖止之不聽直

冒東軍死烈祖成績按黑田家譜左近已傷而退

死之又按逸史左近子新吉有二弟挈家竄山中

養母十年所窮甚不能自存當東照公在駿府

二人竊議曰吾聞官懸重賞以購石田氏黨今一

人捨軀足以終養弟固請為囚兄乃詒母以弟官

遊及接之以請府自言山民誘擒勝猛子有司付
弟獄賞兄兄不忍去連夜彷徨獄畔獄吏執以獻
乃首實曰請速就顯戮公憫其孝義特有一
人令迎母於府下厚給終身云未詳其所據
小幡信世稱助六上野人年十五仕石田三成有

名節錄 卷之三
寵食祿二千石。關原之役。從三成。及軍敗。與三成相失。走石山。索三成不得。尋見捕。東照公次大津。召信世問三成所在。對曰。臣固知之。然身被石田氏恩顧。今不忍負之。臣頭可斷。主居處不可言也。公曰。義士特宥之。信世得釋而出。直入一僧家。曰。吾石田氏臣小幡助六也。躬爲囚。分誅戮。不圖今日遇寬宥。然偷生受辱。不如死也。願吾死後埋吾屍。因伏及死。寺僧以聞。公爲歎惜焉。常山紀談

武家盛衰記

論曰。天下切齒石田三成久矣。人人欲食其肉。及其死也。天下無不撫掌稱快。蒲生鄉舍。島清興。小幡信世。皆爲三成寵臣。而今爲之傳。無乃助小人之黨。而勸禍亂乎。曰。不然。余之傳是三人。蓋以勵綱常也。士之生於亂世。不仕則已。苟仕也。則死其事。不敢以其君之賢不肖。改其節。故曰。人臣忠於所事。若夫食人之祿。不能死人之事。是庸碌貪鄙。覲然無耻者耳。余竊憫鄉舍清興之徒。固以功名自期。其仕三成。蓋亦非其初志也。不幸爲三成所

名節錄 卷之三
知則當如何報亦惟為知己者死而已。二人者不以其謀不用而為自全之計。庚子之役終冒鋒以死。視之當時畏死賣降者不可同日而語也。信世之事無所考其詳。然至其臨死一語義氣凜然使人興起。東照公特命葬祭鄉舍首。宥信世死皆所以為天下萬世人臣獎勵也。余之傳三人不特勵綱常亦可以見國家之興有由也。

米村權右衛門

米村權右衛門大野治長臣也。為人剛強有義氣。

初為琴鞋奴漸被寵任。

武將感狀記

關原之役治長在

東軍從戰關原與宇喜多氏驍將高知七郎左衛門相搏治長馬上以槍鏃七郎左衛門跨其背刎之。

落穗集高知作河內

大阪之役從在大阪城

陷治長自殺權右衛門受遺孀其少女發覺被捕至江戶吏訊權右衛門曰大阪城中庫藏貲財幾許對曰不知也吏曰汝修理寵臣何謂不知語稍侵之權右衛門方伏額地忽蹶起罵曰我主在城中唯議軍事而不言金錢其部下謀斫陣擒敵而不

遑其他吾何得與知且城中戰敗首領猶不保費財何為若戰勝則至將軍佩刀皆我輩之有費財不求而自來今日裂口拔舌安言費財有無東

照公聞之嘆曰吾欲得如米村者今傳右兵衛常

陸也特宥之後權右衛門仕淺野長晟置治長女

於京師厚撫之其祿仕蓋亦為之也武將感狀記按落穗集

卯之役城陷治長命米村權右衛門送秀賴夫人德川氏於東軍乞秀賴母子命權右衛門請共灰

于城不許夫人既出城外治長有女從焉權右衛門乃追及夫人于城外東將坂崎出羽來護夫人

權右衛門告以故乃俱奉夫人於一民家因本多正信聞之東照公及台德公乞宥秀賴母子

右兵衛尾張侯義直

常陸介紀伊侯賴宣

見允權右衛門大喜既而聞秀賴母子及治長等皆自殺乃驚愕欲入城東軍既守四門無可奈何治長女遂從夫人赴關東權右衛門使已女從焉尋自赴關東治長女適得疾權右衛門護之如京師養疾權右衛門女性順謹與父俱侍湯藥晝夜不離左右後疾日篤終不起權右衛門火葬之是日女悲號不自禁忽投燄火中抱棺殉之觀者酸鼻權右衛門收骨葬高野山終削髮號權入隱京師妙心寺後淺野因幡守召而祿之年八十餘沒與本書不合可疑權右衛門女殉死甚偉錄以備考

論曰昔陳蕃竇武之遭禍也蕃友朱震匿其子逸

事覺繫獄受考掠誓死不言武掾胡騰亦匿武孫

輔二人之名藉藉傳於後世而不朽者不獨以其

懷梓白之節亦由蕃武共為天下名士也惜乎米
 村氏之節似二人而不為人所稱道者豈非以其
 為治長臣耶然士各盡忠所事安得以其主沒其
 臣節哉。

名節錄卷之三終

慶應二年丙寅五月新鐫

發行

書林

- | | |
|-----------|---------|
| 江戶日本橋一丁目 | 須原屋茂兵衛 |
| 同 二丁目 | 山城屋佐兵衛 |
| 同 芝神明前 | 岡田屋嘉七 |
| 京御幸町姉小路 | 菱屋孫兵衛 |
| 大阪金田町 | 象牙屋治郎兵衛 |
| 同心齋橋通安堂寺町 | 敦賀屋彦七 |
| 同博勞町角 | 河內屋茂兵衛 |
| 同安堂寺町 | 秋田屋太右衛門 |
| 同北久太郎町 | 河內屋吉造 |
| 同北久太郎町 | 河內屋喜兵衛 |
| 同唐物町 | 河內屋喜兵衛 |

